

INUIT ATAQATIGIIT

INATSISARTUNI



Aasiaat 4.august 2016

Inatsisartut suleriaasianni § 37 naapertorlugu Naalakkersuisunut imaattunik apeqqute-qarpunga:

- 1. Qaasuitsup Kommunea marlunngorlugu avinneqassagalarpat tamanna aningaasatigut kinguneqarsinnaanera pillugu naalakkersuisut qanoq naatsersuuteqarpat?**
 - a. **Naalakkersuinikkut aqutsinermut qanoq annertutigisumik ukiumut aningaasartuuteqarnerulersinnaaneq naalakkersuisuniit naatsersuutigineqarsinnaava?**
 - b. **Allaffissornermut qanoq annertutigisumik ukiumut aningaasartuuteqarnerulersinnaaneq naalakkersuisuniit naatsersuutigineqarsinnaava?**
 - c. **Innuttaasumut ataatsimut qanoq annertutigisumik ukiumut aningaasartuuteqarnerulersinnaaneq naalakkersuisuniit naatsersuutigineqarsinnaava?**
 - d. **Ukunani kommuneqatigiinni kommuni sorleq aningaasatigut atugarissaarnerullunilu aningaasatigut imminut nammassinnaanerussava? Aamma sooq taamaassava?**
 1. **Aasiaat – Qasigianguit – Qeqertarsuaq – Kangaatsiaq**
 2. **Ilulissat – Uummannaq – Upernavik – Qaanaaq**
 3. **Qaasuitsup Kommunea marlunnut avinneqarpat kommuninut sorlermut aningaasatigut kingunerluuteqarnerussava? 1 imaluunniit 2?**
 - e. **Kingunerluutasinnaasunik allanik naalakkersuisut taasaqarsinnaanerlutik Qaasuitsup Kommunea marlunnut avinneqassagalarpat?**
 - f. **Qaasuitsup Kommuneata avinneqarnera kia akilissavaa? Naalakkersuisut qanoq isumaliuteqarpat? Kommunit nammineq akilisavaat? Imaluunniit nunatta karsiata akilissavaa?**
 - g. **Qaasuitsup Kommunea qaqugu avinneqasava?**

(Inatsisartuni ilaasortaq Peter Olsen, Inuit Ataqatigiit)

Naluneqanngitsutut 29.juni 2016 Qaaasuitsup Kommunalbestyrelsiata aaliangerpaa naalakkersuisunut inassuteqaateqartoqassasoq Qaasuitsup Kommunea marlunngorlugu avinneqarnissaa pillugu. Qaaasuitsumi kommunalbestyrelsip ataatsimut isumaqatigiittup aaliangerpaa kommuneqarfik 1. Tassaasasoq Ilulissat – Uummannaq – Upernavik aamma Qaanaaq. Kommuneqarfik 2. Tassaassasoq Aasiaat – Qasigianguit, Qeqertarsuaq Kangaatsiarlu.

Kommunalbestyrelsip taamatut aaliangernerminut innuttaasunik taasitsisimaneq tunngavilersuutiginerarpaa. Taamanikkut taasititsinermi amerlanerussuteqangaartut kissaatigaat Qaasuitsup Kommuneata avinneqarnissaa.

Apeqquserneqarsinnaangilaq aamma tusaanngitsuusaarneqarsinnaangilaq innuttaasut taamatut kissaataat oqariartuutaallu. Kissaataallu piviusunngortinneqarsinnaasariaqarpoq. Apeqquserneqarsinnaangikkaluarpalluunniit, taamaattoq apeqquserneqarsinnaasutuaq tassaaginnarsoraara ilumut paasisutissanik eqqortunik tunngaveqarluni taasititsioqarsimnersoq aammalu paasisiniaasoqarsimnersoq, avittoqassagaluarpat naalakkersuinikkut allaffissornikkut innuttaasunullu ataasiakkaanut aningaasatigut qanoq kinguneqarsinnaanera pillugu.

Ilimagilluinnarpara innuttaasut amerlasuut ilisimasimangikkaat Qaasuitsup Kommunea avinneqassagaluarpat tamanna aningaasatigut qanoq kinguneqarumaarnersoq; Immaqa naatsersuutigisimangikkaluarpaat, avitsineq innuttaasunut ataasiakkaanut nalitoorujussuusinnaanera. Immaqa naluaat allaat meeqqeriviit akisunerulersinnaasut, eqqaaveqarneq akisunerulersinnaasoq, sanaartornermut atugassat ikinnerulersinnaasut, timersornermut kulturimullu tapiissutigisartakkat ikinnerulerinneqarnerannik allaat kinguneqarsinnaasoq.

Tamakkua tamaasa Qaasuitsup Kommuniani innuttaasut amerlanerpaartaasa ilisimalerniassammatsigit matumuuna apeqquteqaatikka ingerlateqqippakka.

Kissaatigaaralu apeqqutima ullut qulit iluanni akineqassasoq.